

## **Kalaallit Nunaanni parkeringsskivet pillugit nalunaarut**

Kalaallit Nunaanni aqqusinertigut angallannermut inatsimmi § 33 c naapertorlugu, tak. inatsit nr. 832, 18. december 1991-imeersoq, allanngortinneqartoq inatsisikkut nr. 497-ikkut 17. juni 2008-meersukkut, aalajangersarneqarpoq:

**§ 1.** Piffinni, biilnik inissiinissamut killilimmik piffissaliivigineqarsimasuni, aamma parkometerilernerqarsimannngitsuni imaluunniit inissiinissamut bilitsinik immikkut ittunik piumasaaqateqarfiunngitsuni aamma/imaluunniit inissiinissamut akuersissuteqarfiunngitsuni, biilit parkeringsskivilerneqarsimasut kisimik inissinneqarsinnaapput.

**§ 2.** Parkeringsskivet plastikkimik, pappialamik qeratasuumik plastikkilikkamik imaluunniit atortussiamik allamik taamatulli qajannaatsigisumik sanaajussapput.

*Imm. 2.* Taakku ilanngussaq 1 malillugu ilusilersorneqarsimassapput. Kisitsisilli 13-imiit 24-mut mininneqarsinnaapput.

*Imm. 3.* Tikkuutit nalunaaqutaasartaatalu qalipaataat assigiinngitsuussapput. Imm. 2-miittutut ittut eqqaassanngikkaanni nalunaaqutaasartaata iluani allamik naqissimasoqassanngilaq.

*Imm. 4.* Biilimik nunami allami nalunaarsorneqarsimasumik inissiinermi parkeringsskivet nunagisaani piumasaaqatigineqartut atorneqarsinnaapput.

**§ 3.** Inissiineq aallartippat piffissami inissiisinnaanermut killigaasumi parkeringsskivep tikkuutai inissiiffiup aallartiffianut inissinneqassapput. Piffissap aallartiffia akunnerup sisamararterutaata, inissiiffiup allartiffiata, qaangiunneratut nalunaarneqassaaq.

*Imm. 2.* Piffissaq killiligaq sioqqullugu inissiineq aallartinneqarpat tassanilu ingerlaannassalluni, tikkuut killilimmik piffissaliussap aallartiffianut inissinneqassaaq.

*Imm. 3.* Aqqusinertigut angallatip inissinneqarsimanerata nalaani piffissaq killiligaanngitsoq aallartissappat tikkuut kingusinnerpaamik piffissap naanerani inissinneqassaaq piffissap killilikkap atuutileqqinneraniit.

*Imm. 4.* Parkeringsskivep tikkuutaa inuup nammineerluni inississavaa. Inissiisoqassaaq atortut elektroniskiusut imaluunniit mekaniskiusut ikiortiginagit.

**§ 4.** Parkeringsskive siuani igalaap imaluunniit matut siorliit igalaavisa arlaannut inissinneqassaaq. Pisuinnaat aqqaataa killingani biilnik inissiinermi matup siorliup igalaava taamaallaat atorneqarsinnaavoq matu pisuinnaat aqqaannut sammippat. Parkeringsskive aalajangersorlugu ikkussaq siuani igalaap ataatatungaanut talerpianut inissinneqarsimassaaq.

*Imm. 2.* Inissiiffissani imm. 1-imi taaneqartuni allanik parkeringsskiveqassanngilaq, taamaallaat inissiinermi atorneqartartoq kisimi, imaluunniit parkeringsskivemut paarlaanneqarsinnaasumik allanik peqassanani.

*Imm. 3. Parkeringsskive biilit silataanniit atuarneqarsinnaassaaq.*

§ 5. Parkeringsskivep inissitsiternera inissiinerup taassuminnga atueqqusaaffiusup nalaani allanngortinneqassanngilaq.

§ 6. Inissiineq kingusinnerpaamik kipitinneqassaaq inissiinissamut piffissarititaasup, piffimmi atuutsinneqartup, naanerani. Piffissarititaq naatsorsorneqassaaq piffissaq, parkeringsskivemi nalunaarneqarsimasoq, aallarnerfigalugu.

§ 7. Nalunaarut atortuulerpoq ulloq 1. oktober 2008.

*Inatsiseqarnermut ministereqarfik, ulloq 25. september 2008*

BRIAN MIKKELSEN

/Kira Gandrup